



# Sambanwá

## GIYA SA PAGSAMBA KAN BANWAAN NIN DIÓS

IKA-XIV DOMINGO KAN ORDINARIONG TAON  
07 JULIO 2024 • TAON B • VERDE

### RITO SA PAGPOÓN

#### Patará-tará

C — Bilang mga akì kan Diós sa paagi kan inakò tang bonyag pigpapagiromdom kita na padagos na isabuhay asin ipadagos an pagpahayag kan marahay na bareta kan Kagurangan na enot ipinahayag ni Cristo. Ini magigibo sa paagi nin paglingkod sa satong kapwa.

#### Antifona sa Paglaog

(Cf. S 47, 10-11) (Tindog)  
(Sinasambit kun mayo nín Awít sa Paglaog)

O Diós, nag-ako kami kan pagkaherañ mo sa tahaw kan saimong templo. O Diós, siring sa ngaran mo, an pag-omaw saimo sagkod sa poró kan kinâban; an tóo mong kamot panô nin katanosan.

#### Pagpangurus asin Pagtaong-galang

P — Sa ngaran kan Amâ, asin kan Akì, asin kan Espiritu Santo.

B — Amen.

P — An Kagurangan mapasaindo.

B — Asin sa saimong espiritu.

#### Gawe nin Pagsolsol

P — Mga tugang acoon ta an satong mga kasâlan, tanganing magkanigo kitang magcelebrar kan mga banal na misterio.

P — Ika na sinugo sa pagpaomay kan mga nagsosolsol: Kagurangan, maherak ka.

B — **Kagurangan, maherak ka.**

P — Ika na nagtutukaw sa tóo kan Amâ sa pagsurog samo: Kagurangan, maherak ka.

B — **Kagurangan, maherak ka.**

P — Maherak man lugod sato an Diós na makakamhan asin, pakapatawada an satong mga kasâlan, darahon kita sa buhay na daing kasagkoran.

B — Amen.

#### Kamurawayan

**Gabos — Kamurawayan sa Diós** sa kaitaasan asin sa dagâ katoninongan sa mga tawong marahay an boót. Inoomaw mi ika, rinorokyaw mi ika, sinasamba mi ika, pinapamuraway mi ika, pinapasalamatán mi ika huli kan dakula mong kamurawayan, Kagurangan na Diós, Hadeng langitnon, Diós Amang makakamhan. Kagurangan Aking Bogtong Jesu Cristo, Kagurangan na Diós, Cordero kan Diós, Aki kan Amâ, ika na nagpaparà kan mga kasâlan kan kinâban, kaheraki kami; ika na nagpaparà kan mga kasâlan kan kinâban, ahoa an samong pakimaherak; ika na nagtutukaw sa too kan Amâ, kaheraki kami. Ta ika sana an Banal, ika sana an Kagurangan, ika sana an Orog Kahalangkaw, Jesu Cristo, kaiba kan Espiritu Santo: sa kamurawayan kan Diós Amâ. Amen.

tagapagtaram sa tahaw nin sayang mga kahimanwa, mga tawong "masombikal" kan Marhay na Bareta" maghimate man sinda o dai.

#### Pagbasa sa Libro ni Profeta Ezekiel

Pakataram nin siring kan KAGURANGNAN, luminaog sako an espiritu, pinatindog ako sa sakong mga bitis, asin nadangog ko an kaolay ko. Nagsabi siya sako: "Akì nin tawo, sinusugò taka sa mga Israelita, sa mga rebelde na nagrebelde sako. Sinda asin an saindang mga magurang nagsombikal sako, sagkod ngonian mismong aldaw. Mga akì na mahibog an lalawgon asin matagas an puso an sinusugoan ko saimo, tanganing masabihan mo: Siring an sabi kan KAGURANGNAN Diós. Magdangog sinda o dai makilabot – ta sutil na harong sinda – aramon lamang ninda na igwa nin profeta sa tahaw ninda.

Tataramon kan Kagurangan.  
**Gabos — Salamat sa Diós.**

#### Colecta

P — Mamibi kita.

O Diós, na huli kan kapakumbabaan kan saimong Aki, binangon mo an napadungkal na kinâban, sa saimong mga paratubod, tâwan an banal na kaogmahan, tanganing an mga hinâwas mo sa kaoripnan nin kasâlan, gibohon mong makinabang kan danay na kaogmahan. Huli ki Jesu Cristong Kagurangan niamo, saimong Aki, na kaiba mong nabubuhay asin naghahade, kasarô kan Espiritu Santo, Diós, sa gabos na kapanahonan kan mga panahon.

B — Amen.

#### Salmo Responsorial

(Salmo 123, 1-2a. 2b. 3-4)

**S — An samong mga mata pasiring sa Kagurangan, sagkod na kami kaugayan.**

1. Pasiring saimo initaas ko an sakong mga mata, ika na nageerok sa langit – siring kan mga mata nin mga sorogoan na pasiring sa kamot kan saindang mga amo. (S)
2. Siring sa mga mata kan lingkod na babae na pasiring sa kamot kan sayang amâ, siring man an mga mata niamo pasiring sa KAGURANGNAN na samong Diós, sagkod na kaugayan kami. (S)
3. Kaugayi kami, KAGURANGNAN, kaugayi kami, huli ta pinagutiran kami nin paghamak; huli ta pinagutiran an samong mga kalag kan mga pag-olog-olog kan mga layaw, an paghamak para sa mapagpa-langkaw! (S)

## LITURGIA KAN TATARAMON

### Enot na Babasahon (Tukaw)

(Ezekiel 2, 2-5)

*Si Profeta Ezekiel sinugo kan Diós bilang sarong*



Hinimo asin inandam kan Caceres Commission Communications asin kan Commission on Liturgy • Ciudad nin Naga, Filipinas • 2024

RSSMO. REX ANDREW C. ALARCON, DD, Arzobispo kan Caceres  
PDR. LUISITO A. OCCIANO, Direktor kan Caceres Commission on Communications  
PDR. GLENN C. RUIZ, STHL-MA, Direktor kan Commission on Liturgy  
JUAN CARLOS R. MADRID asin JOHN PAUL M. AVEN, Mga Editor

## Ikaduwang Babasahon

(2 Corinto 12, 7-10)

*Ipinapahayag sa ikaduwang babasahon an kahalagahan kan pag-akò kan satong mga kaluyahan bilang mga tawo. Digdi ipinapahiling sato na sa tahaw kan satuyang mga kadaihan kita pigpapakusog kan pagkamoot kan Diós.*

### Pagbasa sa Ikaduwang Surat ni San Pablo sa mga taga-Corinto

Mga tugang: Ta ako, si Pablo, tanganing dai ako manganâ sa kaogmahan huli sa labi-labing kadakulaan kan mga kapahayagan, tinâwan ako nin tunok sa laman, sugò ni Satanás, sa paglanôg sako, tanganing dai ako manganâ sa kaogmahan. Manungod kaini tolong beses kong kinaólay an Kaguranganan na mawarâ lamang sako; alagad siya nagsabi sako: "Igó na saimo an sakong gracia; ta an kapangyarihan nalulubós sa kaluyahan." Kaya orog kaogma kong i-oorgolyo an mga kaluyahan ko, tanganing mag-erok sako an kapangyarihan ni Cristo. Kaya ikinaka-ogma ko an mga kaluyahan, an mga pagtuyâ-tuyâ, an mga kasakitan, an mga pagtugis, asin an mga kahorasaan, huli ki Cristo; ta pag ako nagluluya, dangan ako makusog.

Tataramon kan Kagurangan.

**Gabos — Salamat sa Diós.**

### Pagrokyaw

(Cf. Lucas 4, 18) (Tindog)

(Sinasambit kun dai inaawit an Allelúia.)

**Allelúia, allelúia! An Espíritu kan Kagurangan yaon sako: nagsugó sako sa pagharubay kan marahay na bareta sa mga dukha. Allelúia, allelúia!**

### Evangelio

(Marcos 6, 1-6)

**P —** An Kaguranganan mapasaindo.

**B — Asin sa saimong espíritu.**

**P —**  Pagbasa kan banal na Evangelio susog ki San Marcos.

**B — Kamurawayan saimo, Kagurangan.**

Si Jesus nagluwas hale duman asin naglaog sa sadiri niyang daga, asin sinunod siya kan saiyang mga disipulos. Pag-abot kan Sabbath, nagpoón siya pagtukdo sa sinagoga; dakul na nagdadangog nagngalas na gayo, na an sabi: "Saen kaini nakua ini, asin ano an kadonongan an itinao saiya, an siring na mga milagro na nangyayari sa saiyang mga kamot? Bako ini an panday, an Aki ni María, asin tugang na Santiago, José, Juda saka Simon? Bakong yaon an mga tugang niyang babae digdi satô?" Nagraot an boót ninda saiya. Sabi sainda ni Jesus: "Mayong profeta na dai

iginagalang laen sa sadiri niyang dagâ, sa saiyang mga kadugó asin sa saiyang harong." Dai siya duman nakagibo ni anong ngangalasan, maliban sa nagkapirá sanang may helang, na pinatongan niya ngani kan mga kamot sa pagbulong. Nagngangalas siyang gayo ta mayo sindang pagtubod.

**P —** Marahay na Bareta kan Kagurangan.

**B — Pag-omaw saimo Cristo.**

### Homilia (Tukaw)

### Pagrokyaw kan Pagtubod (Tindog)

Credo Niceno-Constantinopolitan

**Gabos — Nagtutubod ako sa sarong Diós, Amang makakamhan, kaggibo kan langit asin kan dagâ, kan gabos na nahiiling asin dai nahiiling. Asin sa sarong Kaguranganan na si Jesu Cristo, Bogtong na Aki kan Diós, asin namundag gikan sa Amâ bâgo kan gabos na panahon. Diós na gikan sa Diós, llaw na gikan sa llaw, totoong Diós na gikan sa totoong Diós, ipinangaki, dai linalang sarô sa pagka-Diós sa Amâ: huli saya nagkaigwa kan gabos. Huli sa satong mga tawo asin huli sa satong kaligtasan naghilig siya hale sa kalangitan.**

(Sa mga minasunod na tataramon, sagkod sa asin nani-tawo, an gabos minaduko.)

**Asin nani-laman huli kan Espíritu Santo ki Virgen María, asin nani-tawo. Ipinako pa sa cruz para sato kan panahon ni Poncio Pilato; nagtios sagkod sa kagadanan asin ilinubong, asin kan ikatulong aldaw nabuhay-liwat, susog sa mga Kasuratan, asin suminakat sa langit, nagtutukaw sa tóo kan Amâ. Asin mamuraway na mabalik, sa paghukom sa mga buhay asin mga gadan, an saiyang kahadean daing katapusán. Asin sa Espíritu Santo, Kaguranganan asin kagtao nin buhay: na gikan sa Amâ asin sa Aki. Siya, kaiba kan Amâ asin kan Aki, sabay na sinasamba asin pinapamuraway: siya nagtaram sa paagi nin mga profeta. Asin sa sarô, banal, catolico asin apostolicong Simbahan. Nagpapahayag ako nin pagtubod sa sarong bonyag sa pagpatawid nin mga kasâlan. Asin naghalat ako kan pagkabuhay-liwat nin mga gadan, asin kan buhay sa maabot na panahon. Amen.**

### Pamibi nin Banwaan

**P —** Nag-aaram na an Amâ nakikiolay sato sa manlaen-laen na kamugtakan, mamibi kita na madangog ta an saiyang tingog asin maghimate kan saiyang mensahe.

**S —** Kaguranganan, hinanyoga an samong pamibi.

**1. Tanganing an mga namamayó kan Simbahan maghulit kan tataramon kan Diós na may kusog-boót asin maisabuhay ini na may pusog na pagtubod, ipamibi niato sa Kaguranganan. (S)**

**2. Tanganing an mga magurang na Cristiano mapakusog sa pagsunod ki Cristo, an dalan, katotoohan asin buhay, ipamibi niato sa Kaguranganan. (S)**

**3. Tanganing an satuyang mga familia, mga katood asin kahimanwa na nagin bendicion para sato magdanay sa pagkamoot kan Diós, ipamibi niato sa Kaguranganan. (S)**

**4. Tanganing an mga naghehelang asin mga nagagabatan sa buhay makamate kan pagpadangat kan Diós huli kan pagmakulog kan saindang mga familia, ipamibi niato sa Kaguranganan. (S)**

**5. Tanganing an mga gadan niatong mahal sa buhay na yaon na sa pag-iriba kan mga banal, talingkas sa mga kahorasaan nin buhay, ipamibi niato sa Kaguranganan. (S)**

**P —** Amang makakamhan, tabangi kami sa gabos niamong gibo ngonian na semana, an samuyang mga tataramon asin mga gibo magin burabod nin kaogmahan para sa mga nasasabatan niamo. Huli ki Cristo samong Kaguranganan.

**B — Amen.**

## LITURGIA KAN EUCARISTIA

### Pagdolot (Tukaw)

(Sinasambit kun mayong Awit sa Pagdolot)

**P —** Inoomaw ka, Kaguranganan, Diós nin gabos...

**B —** Pag-omawon an Diós sagkod pa man.

**P —** Inoomaw ka, Kaguranganan, Diós nin gabos...

**B —** Pag-omawon an Diós sagkod pa man.

**P —** (Tindog) Magpamibi kamo, mga tugang...

**B —** Akoon man lugod kan Kaguranganan an atang sa saimong mga kamot para sa kaomawan asin kamurawayan kan saiyang ngaran, para man sa pakinabang niato asin kan bilog niyang banal na Simbahan.

### Pamibi sa mga Dolot

**P —** An dusay na pagdolot sa saimong ngaran maglinig samo, Kaguranganan, asin magdara samo aroaldaw sa gawe nin langitnon na buhay. Huli ki Cristo samong Kaguranganan.

**B — Amen.**

## Prefacio II sa mga Domingo kan Taon

An misterio nin paglitas

P — An Kagurangan mapa-saindo.

B — **Azin sa saimong Espiritu.**

P — Iitaas an mga puso.

B — **Initaas mi na sa Kagurangan.**

P — Magpasalamat kita sa Kagurangan, satuyang Diós.

**B — Maninigo asin Dapat.**

Totoong maninigo asin dapat, matanos asin nakakaligtas, na danay asin minsan saen magpasalamat kami saimo: Kagurangan, banal na Amâ, Diós na makakamhan na daing kasagkoran huli ki Cristo samong Kagurangan:

Siya na naherak sa mga salà nin tawo, nagpakumbabang mamundag sa Virgen. Siya na nagtios kan cruz, nagtalingkas samo sa danay na kagadanan, asin sa pagbangon hale sa mga gadan, nagtao samo nin buhay na daing kasagkoran.

Kaya kaiba kan mga Angeles asin Arcangeles, kaiba kan mga Tronos asin Dominaciones, asin kaiba kan gabos na langitnon na hukbô, nag-aawit kami kan himno kan saimong kamurawayan, daing-tapos na nagsasabi:

**Gabos — Banal, Banal, Banal an Kagurangan Diós ni mga hukbô. An langit asin dagâ pano kan Saimong kamurawayan. Hosanna sa kaitaasan. Paladan an minadigdi sa ngaran kan Kagurangan. Hosanna sa kaitaasan.**

## Pamibi sa Eucaristia (Luhod)

P — Misterio kan Pagtubod.

B — An pagkagadan mo, Kagurangan, ipinapamareta niamo, an Pagkabuhay mo liwat ipinapahayag, sagkod na ika magdatong.

P — Huli saiya, asin kaiba niya...  
B — Amen.

## RITO SA PAGCOMUNION

### Ama Niamo (Tindog)

P — Natukdoan kan mga...

**Gabos — Amâ niamo, na yaon sa langit: pabanalon an ngaran mo; magdatong an kahadean mo; mangyari an boót mo sa dagâ nin siring sa langit. An samong kakanon sa aroaldaw itao mo samuya ngonian, asin patawadon mo kami sa samong mga kasâlan, siring na pinapatawad niamo an mga nagkakasalà samuya; asin hare kami pagdaraha sa sugot; kundi agawa kami sa maraot.**

P — Agawa kami sa gabos...

**B — Huli ta saimo an kahadean, asin an kapangyarihan, siring man an kamurawayan sa mga kapanahonan.**

P — Jesu Cristong Kagurangan...

**B — Amen.**

## Pagpahayag kan Katoninongan

P — An katoninongan...

**B — Asin sa saimong espiritu.**

P — Magpatinaraohan kamo nin katoninongan.

## Cordero

**B — Cordero kan Diós, na nagpaparà kan mga kasâlan kan kinâban: kaheraki kami. Cordero kan Diós, na nagpaparà kan mga kasâlan kan kinâban: kaheraki kami. Cordero kan Diós, na nagpaparà kan mga kasâlan kan kinâban: tawi kami nin katoninongan.**

## Pag-alok sa Pagcomunion (Luhod)

P — Uya an Cordero kan Diós...

**Gabos — Kagurangan, bako akong maninigo na ika magdagos sa sakuyang harong: alagad magtaram ka sana, asin an sakong kalag maoomayan.**

## Antifona sa Comunion

(Mt 11, 28) (Tindog)

(Sinasambit kun mayong Awit sa Comunion)

**Madya kamo sakò, gabos na napapagal asin nagagabatan, asin rarangahan ko kamo, olay kan Kagurangan.**

## Pamibi Pakacomunion

P — Mamibi kita.

Kagurangan, namimibi kami, warasan samo na mga napanô nin kadakul na atang, na magkamit kan mga nakakaligtas na balaog, asin dai nanggad mag-ontok sa pag-omaw saimo. Huli ki Cristo samong Kagurangan.

**B — Amen.**

**P — Gibohon niyang mahigos sa mga diósnon na tataramon an saindong mga puso tanganing danay ining mapanô nin mga kaogmahan.**

**B — Amen.**

**P — Mantang nasasabotan an mga marahay asin matanos, kamo danay na makaabot na naglalakaw sa dalan kan mga tugon kan Diós, asin mahimong mga paramana kaiba kan mga naenot nang kahimanwá.**

**B — Amen.**

**P — Asin an bendicion kan Diós na makakamhan, Amâ, asin Akì, ✕ asin Espiritu Santo, maghilig asin magdanay saindo sagkod pa man.**

**B — Amen.**

**P — Lakaw kamo sa katoninongan ni Cristo.**

**B — Salamat sa Diós.**



## RITO SA PAGTAPOS

### Solemneng Bendicion

P — An Kagurangan mapasaindo.

**B — Asin sa saimong espiritu.**

P — Magduko kamo sa pagbendicion.

An makakamhan na Diós danay na maglikay saindo sa gabos na karâtan, asin magkanigong magwaras saido kan mga balaog nin saiyang bendicion.

**B — Amen.**